

Rekstur björgunarbáta **Þjónustusamningur**

Inngangur

Samgönguráðuneytið, kt. 550269 – 1639, Hafnarhúsi, 150 Reykjavík, f.h. ríkisins í samningi þessum nefnt verkkaupi og Slysavarnafélagið Landsbjörg, kt. 560499 – 2139, Stangarhyl 1, 110 Reykjavík, í samningi þessum nefnt verksali, gera með sér á grundvelli 30. gr. laga nr. 88/1997, um fjárreiður ríkisins, svohljóðandi þjónustusamning um rekstur björgunarbáta.

1. Gildissvið

- Samningur þessi er um rekstur björgunarbáta, sem starfa eftir reglum Björgunarbátasjóðs Slysavarnafélagsins Landsbjargar frá 16. janúar 1999, sjá fylgiskjal I.
- Verkkaupi tekur þátt í kostnaði við björgunarbátana, eftir þeim reglum og með þeim takmörkunum sem felast í samningi þessum.
- Sameiginlega keppa aðilar að sem bestri nýtingu þeirra fjármuna sem verkkaupi greiðir verksala ásamt með tryggum rekstri björgunarbáta í hverjum landsfjórðungi svo stuðla megi að bættu öryggi sæfarenda.

2. Tilgangur með rekstri björgunarbáta og skipulag

- Tilgangur með rekstri björgunarbáta er að reka stóra björgunarbáta í C og B2 flokki í samvinnu við björgunarsveitir í öllum landshlutum.
- Reglur Björgunarbátasjóðsins gilda um rekstur björgunarbátanna. Þar er einnig að finna ákvæði um skipulag og starfsemi sjóðsins.
- Slysavarnafélagið Landsbjörg gerir rekstrarsamning við björgunarsveitir í viðkomandi landshluta til að tryggja bestu nýtingu þeirra fjármuna sem samningurinn nær til.
- Um skipulag og starfshætti fer að öðru leyti eftir ákvörðun verksala.

3. Þjónusta

- Björgunarbátar skulu ávallt vera til taks í útköll á hverjum tíma á þeim svæðum sem rekstrarsamningur við einstakar björgunarsveitir segir til um.
- Slysavarnarfélagið Landsbjörg skuldbindur sig til að þjálfa áhafnir bátanna til útkalla og meðferðar bátanna samkvæmt kröfum verksala.

4. Lágmarkskröfur og gæði þjónustunnar

- Bakvaktir áhafna verði skipulagðir með þeim hætti að alltaf sé a.m.k. ein áhöfn til reiðu á hverjum tíma.
- Bátarnir skulu vera í sem bestu ásigkomulagi á hverjum tíma til að tryggja öryggi ef til útkalls kemur.
- Verði, af einhverjum ástæðum, björgunarbátur ekki fær um að fara í útköll vegna bilunar eða skemmda, skal tryggt að björgunarmiðstöð hafi vitneskju um það.
- Félagið tryggir eðlilegt viðhald björgunarbátanna, bæði véla og annars búnaðar.
- Verksali sér til þess að einungis hæft starfsfólk með nauðsynlega menntun og þjálfun sinni þjónustunni og viðhaldi öllu.
- Í skipa- og véladagbók skal skrá nauðsynlegar upplýsingar um ferðir bátanna.
- Skipstjórnarmenn björgunarbátanna skulu í hvívetna fara að lögum þeim og reglum, sem ná til reksturs þeirra.

5. Fjármögnun

- Vegna samningsins greiðir verkkaupi samtals 18.0 mkr. árið 2001, 18.0 mkr. árið 2002, 18.0 mkr. árið 2003 og 18.0 mkr. árið 2004, sjá þó endurskoðunarákvæði í lið 13. Greiðslan miðast við að verksali beri einn faglega og fjárhagslega ábyrgð á rekstri sínum, þ.m.t. á greiðslu launa, lífeyrisskuldbindinga vegna starfsmanna sinna, starfstengdum kostnaði t.d. launum í barnsburðarleyfi, launum staðgengla vegna veikinda, námsleyfa og námskostnaðar.
- Verksali annast greiðslu til umsjónaraðila einstakra björgunarbáta.

6. Greiðslutilhögun

- Greiðsla ríkisins skal lögð á bankareikning verksala nr. 1175-26-995 í jöfnum mánaðarlegum upphæðum hinn 15. dag hvers mánaðar.
- Hafri greiðsla ekki verið innt af hendi fyrir lok mánaðar getur verksali krafist hæstu lögleyfðu dráttarvaxta, enda megi greiðsludráttinn telja til atvika sem rekja má til verkkaupa.

7. Fjárreiður og fjárhagslegar ráðstafanir

- Verksala er aðeins heimilt að fengnu skriflegu leyfi verkkaupa að ráðast í eða taka þátt í óvenjulegum ráðstöfunum, sem kynnu að leiða af sér þá hættu að eigi verði staðið við samning þennan.
- Um reikingshald og endurskoðun ársreiknings gilda lög um ársreikninga nr. 144/1994 og um bókhald nr. 145/1994.
- Halda skal reikningshaldi vegna starfsemi og þjónustu samkvæmt samningi þessum aðgreindu í bókhaldi frá öðrum rekstri verksala.

8. Eftirlit með framkvæmd samningsins

- Verksali mun sjálfur annast daglegt eftirlit og faglegt eftirlit með þjónustunni sem samningurinn nær til. Siglingastofnun Íslands mun fyrir hönd verkkaupa annast almennt eftirlit með þjónustu þeirri sem samningur þessi fjallar um. Eftirlitið felst í því að gera kannanir á starfsemi björgunarbáta auk þjónustukannana hjá þeim sem rekstur þeirra varðar.
- Þá mun Siglingastofnun annast önnur samskipti f.h. verkkaupa, sem samningurinn gerir ráð fyrir.
- Ríkisendurskoðun er heimilt að gera fjárhagsendurskoðun á allri þeirri starfsemi verksala sem umsamin er í samningi þessum. Í því sambandi er verksala skylt að afhenda Ríkisendurskoðun alla reikninga sína, öll bókhaldsgögn og önnur gögn sem nauðsynleg eru við endurskoðunina, sbr. lög nr. 86/1997 um Ríkisendurskoðun.
- Ríkisendurskoðun getur einnig framkvæmt stjórnýsluendurskoðun á framkvæmd þjónustunnar hjá verksala sbr. lög nr. 86/1997 um Ríkisendurskoðun.

9. Upplýsingaskylda

- Verksali skuldbindur sig til að upplýsa verkkaupa tafarlaust megi honum vera ljóst að hann geti ekki staðið við fjárhagslega eða faglega skilmála samnings þessa.
- Verksali skal ótilkvaddur senda verkkaupa, Ríkisbókhaldi, Ríkisendurskoðun og fjármálaráðuneytinu fyrir lok mars ár hvert endurskoðaðan ársreikning ársins á undan, ásamt ársskýrslu þar sem gerð er grein fyrir starfseminni.
- Innan þriggja mánaða frá lokum reikningsárs, ár hvert, skal skilað inn ársreikningi í samræmi við ákvæði laga um ársreikninga nr. 144/1994 og um bókhald nr. 145/1994 sem inniheldur eftirfarandi
 1. Rekstrarreikning
 2. Efnahagsreikning
 3. Reikningsskilaaðferðir og almennar skýringar
 4. Sundurliðanir og skýringar

Einnig skal verksali leggja fyrir Siglingastofnun Íslands árlega skýrslu um starfsemi björgunarbátanna þar sem komi fram fjöldi útkalla, ástand bátanna og fleira því tengdu.

10. Þagnarskylda

- Verksali og starfsmenn hans skulu bundnir þagnarskyldu um það sem þeir fá vitneskju um í starfi sínu og leynt skal fara lögum samkvæmt.
- Ráði verksali undirverktaka til starfa skuldbindur verksali sig til að láta undirverktaka og starfsmenn hans undirrita heit um þagnarskyldu.

11. Vanefndir og vanefndaúrræði

- Ef verksali vanefnir samningsskyldur sínar getur verkkaupi rift samningnum. Samningi þessum verður eigi rift nema vanefnd sé veruleg, enda hafi verkkaupi áður gert verksala viðvart skriflega vegna vanefndarinnar og sett honum hæfilegan frest til úrbóta.
- Hafi verksali ekki bætt úr annmörkum samnings þessa, skv. kröfugerð, innan hæfilegs tímafrests hefur verkkaupi heimild til að fresta greiðslu ríkisins þar til úrbætur hafa sannanlega verið gerðar. Verksali á ekki rétt á dráttarvöxtum þótt greiðslum sé frestað samkvæmt þessari grein. Auk þessa getur verkkaupi krafist verksala um bætur vegna hugsanlegs tjóns sem kann að hljótast vegna vanefnda verksala.

12. Meðferð ágreiningsmála

- Rísi ágreiningur um túlkun og framkvæmd á samningi þessum skal honum vísað til þriggja manna sáttanefndar. Tilnefnir verksali einn, verkkaupi annan og oddamaður, sem jafnframt er formaður skal tilnefndur af lagadeild Háskóla Íslands. Skal sáttanefndin skera úr um ágreininginn eins fljótt og kostur er.
- Kostnaður við störf sáttanefndar skiptist jafnt milli verkkaupa og verksala.
- Mál sem rísa kunna vegna samnings þessa skulu rekin fyrir Héraðsdómi Reykjavíkur.

13. Endurskoðunarákvæði

- Samningsaðilar munu endurskoða samninginn í sameiningu fyrir lok ágúst ár hvert með hliðsjón af reynslu af framkvæmd hans, m.a. í þeim tilgangi að tilgreina nákvæmari greiðslu fyrir umsamda þjónustu fyrir eftirfarandi ár.
- Telji samningsaðili að forsendur samningsins hafi breyst getur hann farið fram á viðræður um endurskoðun á einstaka ákvæðum samningsins.

14. Samningstími

- Samningur þessi er til fjögurra ára frá gildistöku hans 1. janúar 2001
- Samningsaðilar ákveða sameiginlega fyrir 1. janúar 2004 hvort stefna skuli að endurnýjun samningsins.
- Aðilar geta sagt upp samningnum með 1 árs fyrirvara.

15. Frumrit samnings

- Af samningi þessum skulu gerð fjögur samhljóða eintök og telst hvert um sig fullgilt frumrit samningsins.
- Eitt eintak skal vera í vörslu verkkaupa, annað í vörslu verksala, það þriðja í vörslu fjármálaráðuneytisins, en hið fjórða skal vera í vörslu Siglingastofnunar Íslands.

16. Fylgiskjöl

- Reglur Björgunarbátasjóðs Slysavarnarfélagsins Landsbjargar frá 16. janúar 1999 með breytingum.

Akureyri, 25 . maí 2001

F. h. samgönguráðuneytisins

F. h. Slysavarnarfélagsins Landsbjargar

Staðfest f. h. fjármálaráðuneytisins

F. h. Siglingastofnunar Íslands